

四庫全書

史部

欽定四庫全書

明會典卷六十五

禮部二十四

婚禮

皇太子納妃儀

成化二十三年定

納采問名

前期擇日遣官告太廟牲用犢各一用祝文至期前一

日所司設御座於奉天殿鴻臚寺設制案節案於御座
前內官監禮部陳禮物於文樓下教坊司設中和樂於殿
內至日清晨錦衣衛設鹵簿於丹陛丹墀禮部設綵輿
教坊司設大樂俱於奉天門外上具袞冕御華蓋殿鴻
臚寺奏執事官行叩頭禮畢請陞殿導駕奉引如常儀
上御奉天殿文武官朝服叩頭訖執事者引正副使朝
服就拜位行四拜禮傳制官奏傳制訖由左門出執事
官舉制案節案亦由左門出傘蓋遮護置丹墀中道傳

制官宣制曰茲擇某官某女為皇太子妃命卿等持節
行納采問名禮正副使又行四拜禮鴻臚寺奏禮畢上
興引禮引節案制案由奉天門左門出執事官引文樓
下禮物隨出至奉天門外正副使取節制書置綵輿中
儀仗大樂前導從二門行出東長安門外正副使釋朝
服乘馬隨行詣皇太子妃府行禮

受納采問名

皇太子妃府前一日設正副使幕次於大門外道左南

向設香案於正堂中設制案節案於香案南別設案於香案之北其日正副使至大門外儀仗大樂分列置綵輿中正中設制案節案於綵輿北引禮引正副使入幕次執事官陳禮物於堂正副使至幕次取節制書置案上禮官一員先入正堂立於東主婚者朝服出見立於西禮官曰奉制聘皇太子妃遣使行納采問名禮引禮引主婚者出迎引禮引正副使捧節及制書先行主婚者隨行至正堂置節及制書於案正使立於案左副使

立於案右引禮引主婚者就拜位行四拜禮詣案前跪
正使取納采制宣訖授主婚者主婚者受之授執事者
置於北案上稍左副使取問名制宣訖授主婚者主婚
者受之授執事者置於北案上稍右主婚者俯伏興平
身執事者舉答問名表案於主婚者後少西取表授主
婚者主婚者受表跪授正使正使置表於案主婚者俯
伏興平身退就拜位又行四拜禮畢正副使出置表綵
輿中訖主婚者至正副使前致詞云請禮從者酒饌畢

主婚者捧幣以勞正副使正副使出主婚者送至大門外正副使進發綵輿於東長安門入至奉天門外以節表授司禮監官奏聞復命

納徵告期冊封

先期一日遣官告太廟所司設制案節案冊案妃冠服禮物中和樂至日清晨設鹵簿綵輿大樂傳制遣使禮儀並同前納采問名儀但設妃儀仗車輅於左順門外候禮物過隨行又改制詞云茲冊某官某女為皇太子

妃命卿等持節行納徵告期冊封禮

受納徵告期冊封

皇太子妃府前一日設正副使幕次香案制案節案冊案玉帛案並同前受納采問名儀但納徵用玄纁束帛穀圭八馬等物其日正副使至皇太子妃府於綵輿中取節制書冊玉帛置於案少候執事者設皇太子妃冠服諸禮物於正堂八馬陳於堂下禮官一員先入正堂主婚者朝服出見禮官曰奉制封皇太子妃遣使行納

徵告期冊封禮主婚者出迎執事舉玉帛冊案前行正
使於案取節及納徵制書副使取告期制書捧之以次
行主婚者後隨至正堂正副使各以節制書置於案退
立於案之左右東西向置玉帛冊案於制書案之南引
禮引主婚者就拜位行四拜禮引詣案前跪正使取納
徵制書宣訖授主婚者主婚者受之以授執事者執事
者跪受置於北案正使捧主授主婚者主婚者受之以
授執事者執事者跪受置於北案副使捧纁授主婚者

主婚者受之以授執事者置於北案畢副使取告期制書宣訖授主婚者主婚者受之以授執事者置於北案主婚者俯伏興平身復位行四拜禮畢正副使入次少候女官捧皇太子妃首飾冠服入中堂左內官陳儀仗車輅等物於大門之內女官以首飾冠服進皇太子妃內官進皇太子妃儀仗於中堂前司禮監官進前受節冊正副使於案取節冊授之仍前立候內官二人引捧節冊監官入中堂前各置於案皇太子妃具服出閣女

官及宮人擁護詣香案前向闕立贊禮女官贊行四拜
禮贊宣冊贊跪皇太子妃跪宣冊女官取冊立宣於妃
左訖贊受冊贊揖主宣冊官以冊進授皇太子妃妃受
冊以授女官女官跪受於右立於西贊出主興又贊四
拜禮畢皇太子妃入閣持節監官由正門出授正副使
報受冊禮畢正副使出大門外置節綵輿中主婚者請
禮從者及以幣勞正副使還至奉天門外以節授司禮
監官捧入復命

醮戒

先期一日所司設皇太子幕次於中左門前丹墀內設皇太子受醮戒位於御座南北向設皇太子拜位於丹陛上北向設贊禮二人位於皇太子丹陛上拜位之北東西相向知班二人位於贊禮之南東西相向設酒饌案於醮戒位之東稍北設司爵司饌各二人位於案之南南向執膳內官先備金爵果合以候是日早鴻臚寺贊引二人具朝服并東宮侍從官先入至太華殿門前

候皇太子出行叩頭禮贊引二人及侍從官導從由奉
天左門入至幕次具袞冕以候鼓三嚴上御通天冠絳
紗袍出鴻臚寺請陞座上御奉天殿樂作警蹕文武官
盛服行叩頭禮分班列侍如常儀樂止贊引導引皇太
子出幕次至殿陛下由東階陞至丹陛拜位北向立贊
禮贊鞠躬四拜興平身贊引導引皇太子由奉天殿左
門入就醺戒位北向立司爵斟酒以進贊引贊跪皇太
子跪贊搢圭贊受爵司爵者以爵立授皇太子皇太子

啐酒訖以爵授內使內使跪受爵退置於案司饌者以果盒跪進皇太子皇太子取少許食訖司饌者興以果盒退置於案贊出圭贊恭聽戒命上命之曰往迎爾相承我宗事勗帥以敬皇太子曰臣謹受命贊俯伏興平身贊復位贊引仍導由左門出至丹陛上拜位立定贊禮贊鞠躬四拜興平身贊禮畢樂作警蹕上降座還宮樂止贊引導皇太子由東陛降丹墀東宮內外官皆導從由奉天左門出午門外幕次易服

妃受醮戒

親迎日妃家先於祠堂陳設祭物妃服燕居冠服妃父
母詣祖宗前行禮奠酒讀祝禮畢執事者具酒饌於內
進妃飲食訖父母坐於正堂女執事引妃詣父母前各
四拜父母命之曰爾往大內夙夜勤慎孝敬毋違母命
之曰爾父有訓爾當敬承妃聽受訖次詣諸尊長行禮
畢改服翟衣以候親迎

親迎

是日早先設皇太子幕次及儀仗奠鴈并所乘輅教坊司大樂及隨侍官舍侍衛官軍俱於午門外妃家先設皇太子幕次於中門之外南向設香案奠鴈案於中堂皇太子受醮戒訖贊引導引至午門外幕次易皮弁服訖贊引跪請陞輅皇太子陞輅執鴈者後隨樂作儀從先導隨侍官舍官軍導從由東長安門至妃家門外贊引跪請皇太子降輅導引至幕次禮官一員先入至正廳立於東西向主婚者具朝服出見立於東西向禮官

曰皇太子奉制行親迎禮引禮二人具服引主婚者迎皇太子於幕次之外內官二員具服引皇太子出幕次主婚者請皇太子入中堂皇太子先行內官具服捧鴈隨入主婚者後行至中堂主婚者進立於堂中之左妃母立於堂中之右東西相向皇太子至中堂女執事二人引妃出房立於妃母之下內官引皇太子至案前內官捧鴈跪進皇太子皇太子以鴈奠於案內官引皇太子稍退近東西向立主婚者詣鴈案前行八拜禮退復

位執事者徹索引禮內官導皇太子先行至中門女轎
夫舉鳳轎至於中門之內內官具妃儀仗於中門之外
女執事引妃出內官跪請皇太子詣轎所啟請揭簾妃
陞轎內官啓請皇太子陞輅前行妃具儀仗從後行由
東長安門進至午門外車駕儀仗侍衛官舍官軍俱止
妃儀仗入左順門內候內官跪請皇太子降輅導引入
幕次候妃至轎止內官跪請皇太子揭簾妃降轎皇太
子先行內執事以帷幕擁護妃後行俱步入左順門內

內官跪請皇太子乘輿先行女官跪請皇太子妃陞轎
後行至宮門外皇太子降輿候妃至女官跪啓請皇太
子妃降轎入幕次候行合巹禮

合巹

其日內官先於皇太子內殿外設妃幕次設皇太子座
於殿東西向設妃座於西東向各設拜位於座之南設
酒案於正中稍南置兩爵兩巹於案上皇太子至宮門
外降輿入候於內殿門外之東西向妃降轎女官以帷

幕擁護導引入幕次整飾訖導引至內殿門西東向贊
引二人導皇太子前陞殿女官二人導妃隨陞贊請就
拜位皇太子與妃各就拜位贊皇太子兩拜妃四拜贊
請陞座皇太子與妃皆陞座女執事二人舉饌案進於
皇太子及妃之前女官司樽者取金爵酌酒以進皇太
子與妃各受爵飲訖女官進饌皇太子與妃皆舉饌訖
女官再以金爵進酒皇太子與妃飲訖女官進饌皆舉
饌訖女官再以盞盞酌酒合和以進皇太子與妃皆飲

訖又進饌皇太子與妃皆舉饌凡三舉酒饌畢執事者徹饌案贊皇太子與妃興就拜位相向贊兩拜如前儀畢皇太子從者餽妃之饌妃從者餽皇太子之饌皇太子從者導皇太子入宮更禮衣妃從者及女官導妃入宮易常服

兩宮朝見

第二日清晨皇太子冕冠妃翟衣女官贊引各啓請出宮至某宮門外以伺某宮服燕居服陞座贊引引皇太

子及妃自左門入皇太子先入妃從之贊禮贊詣某宮
前皇太子立於東妃立於西宮人以服脩盤立於妃之
右贊皇太子與妃皆四拜執事二人舉案至某宮前宮
人以服脩盤授妃妃捧盤置於案執事者舉案妃隨案
進至某宮前妃復位贊皇太子與妃皆四拜興執事者
徹服脩案於東贊禮畢引皇太子與妃出詣上位宮前
伺上位具常服陞座贊引引皇太子及妃由左門入詣
上位前進棗栗盤行禮同前畢詣皇子宫進服脩盤行

禮同前畢贊引引皇太子及妃出是日賜皇太子與妃宴

盥饋

第三日清晨妃服翟衣贊引引妃至某宮由左門入伺膳至贊引引妃至前贊四拜尚食以膳授妃妃捧膳置於案復位又贊四拜禮贊引引妃退立於西南伺膳畢引妃出陞轎詣乾清宮門外降轎由左門入伺膳至贊引引妃詣上位前并皇后前禮俱同

廟見

第四日內官於奉先殿陳設牲醴祝帛贊引二人引皇太子二人引妃至奉先殿詣德祖玄皇帝皇后神御前贊皇太子與妃皆兩拜贊跪皇太子跪妃亦跪贊搢圭皇太子進圭贊進帛執事者跪進於皇太子右贊獻帛皇太子受帛以獻授執事者贊奠帛執事者以帛奠於神御前贊進爵執事者以爵跪進於右贊獻爵皇太子受爵以獻授執事者贊奠爵執事者以爵奠於神御前

贊再進爵執事者以爵進贊獻爵皇太子受爵以獻授
執事者贊奠爵執事者以爵奠於神御前贊俯伏興皇
太子俯伏興妃亦興贊復位贊皇太子與妃皆兩拜平
身次詣各廟禮同前贊詣讀祝位皇太子與妃詣讀祝
位贊跪皇太子跪妃亦跪讀祝訖贊俯伏興平身皇太
子俯伏興平身妃亦興贊復位贊皇太子與妃皆兩拜
平身贊執事者捧祝帛各詣燎所贊詣燎位贊禮畢引
禮引皇太子及妃還宮

慶賀

是日早上具皮弁服御華蓋殿執事官行禮奏請陞殿
導駕樂作陳設如常儀文武百官具朝服先行四拜禮
鴻臚寺官詣丹陛上跪致詞曰某官臣某等恭惟皇太
子嘉禮既成益綿宗社隆長之福臣某等不勝忻忭之
至謹當慶賀又四拜禮畢上起易服賜宴羣臣如冬至
正旦之儀其日命婦慶賀皇太后行禮致詞如前但致
詞某官某夫人妾某氏等後又改妾某氏等禮畢慶皇

后禮同前但改致詞曰皇太子嘉聘禮成益綿景福餘
並同禮畢皇太后賜宴命婦



明會典卷六十五

欽定四庫全書

史部

明會典卷

六十六至
七十一

詳校官編修_臣裴謙

編修_臣程嘉謨覆勘

總校官知縣_臣繆琪

校對官中書_臣盛惇崇

謄錄監生_臣周元濬

欽定四庫全書

明會典卷六十六

禮部二十五

婚禮

親王婚禮

諸司職掌

定親禮物

金五十兩

珍珠一十兩重

用紅綠紗銷金袋二箇

花銀四百兩重

各色紵絲四十疋

用紅綠羅銷金束子一百二十箇

大紅羅二疋

用紅綠羅銷金束子六箇

生紗二疋

用紅綠羅銷金束子六箇

裏絹四十疋

綿臙脂一百箇金花臙脂二兩重

用抹金花銀合一對計六兩重

鉛粉二十袋計一十兩重

用紅綠羅銷金袋二箇

北羊四牽

用紅綠絹銷金蓋袂四條并牽羊紅麻索四條

豬二口

鵞二十隻

酒八十瓶

用紅綠羅銷金小蓋袂八十條每條墜角折二銅錢四箇

圓餅八十箇

用紅紙花貼面

末茶一十袋

用紅綠羅銷金袋一十箇

果六合

白熟米二石

作四合每合上用染紅米二升

麵四十袋

用紅紙花貼面

媒人

紵絲二疋

用紅綠羅銷金束子六箇

裏絹二疋

開合

紵絲一疋

用紅綠羅銷金束子三箇

裏絹一疋

已上禮物媒人并內官一員送至妃家媒人就引妃

家回奉禮物從西華門入如命官則皇帝前復命外
命婦則皇后前復命

納徵禮物

玉穀圭一

累玉圭錦袋二件威玉圭戲金雲鳳硃紅木匣一箇內錦褥一片

玄纁紵絲五疋

玄圭三疋纁二疋用紅絲羅銷金束子十五箇

珠翠燕居冠一項

冠蓋全

冠上火珠博鬢結子等項金

金鳳二箇金寶鈿花二十七箇金簪一對

冠上珊瑚鳳冠簪一副

燕居服四套

大紅紵絲一件

大紅線羅一件

大紅素紗一件

青線羅一件

大帶四條

內大紅線羅三條青線羅一條

玉革帶一副

玉事件九件

金事件三件

玉花綵結綬一副

紅綠線羅綵結大紅線羅繫帶

綵結上玉綵花一箇

綵帶上玉墜珠六顆

綵帶上金垂頭花板四片金葉兒六箇

白玉鈎碾鳳文珮一副

玉事件二十件串珠全

金鈎二箇

紅羅銷金夾袂大小五條

包燕居服及玉革帶等用

珠面花四副

珠花四枝

金脚八錢重

金脚四珠環一雙

金脚五錢重

梅花環一雙

金脚五錢重

金釵花釧一雙

二十兩重

金光素釧一雙

二十兩重

金龍頭連珠鐲一雙

一十四兩重

金八寶鐲一雙

八兩重外寶石一十四塊

金四百兩

九成色二百兩八成色二百兩

花銀一千六百兩

珍珠二十四兩重

用紅綠紗銷金袋二箇

寶鈔五十貫

乘馬四匹

紅龍頭錦韉四副

各色紵絲六十疋

用紅綠羅銷金束子一百八十箇

各色綾六十疋

用紅綠羅銷金束子一百八十箇

各色紗六十疋

用紅綠羅銷金束子一百八十箇

各色羅六十疋

用紅綠羅銷金束子一百八十箇

各色錦六十疋

用紅綠羅銷金束子一百八十箇

大紅羅四疋

用紅綠羅銷金束子一十二箇

生紗四疋

用紅綠羅銷金束子一十二箇

各色絹三百疋

白綿二十斤

臘脂二合重二兩

金臘脂合一對重一十兩

鉛粉二十袋重一十兩

用紅綠羅銷金袋二箇

北羊三十二牽

用紅綠銷金蓋祇三十二條牽羊紅麻索三十二條

緒一十六口

鷺三十二隻

酒二百瓶

用紅綠羅銷金蓋祇二百條墜角折角折二銅錢四箇

末茶三十二袋

用紅綠羅銷金袋三十二箇

果二十合

嚮糖二合

芝麻纏糖二合

茶纏糖二合

砂仁糖二合

胡桃纏糖二合

木彈二合

蜜煎二合

棗子二合

乾葡萄二合

胡桃二合

圓餅六百箇

用紅紙花貼面

白麩一百二十袋

用紅紙花貼面

紅紗罩盞大小一十二箇

開合

紵絲八疋

用紅綠羅銷金東子二十四箇

媒人

紵絲一十二疋

用紅綠羅銷金束子三十六箇

納徵禮儀

前一日尚寶司陳設御座於奉天殿內官監禮部設冠服首飾金銀段疋等儀物於文樓下教坊司設中和樂於殿內其日清晨錦衣衛設儀仗於丹陛丹墀之東西教坊司設大樂於丹陛之東西北向及設樂於午門外設護衛將軍文武官執事官如常儀儀禮司設百官侍立位於文武樓南設玉帛案於殿內之東鼓三嚴文武

官具朝服至侍立位東西相向鐘聲止儀禮司跪奏請
陞殿皇帝具皮弁服導駕奉引如常儀樂作陞座樂止
鳴鞭訖序班舉玉帛案置殿中引正使副使入就拜位
贊鞠躬樂作贊四拜興平身樂止承制官詣御前跪承
制俯伏興由東門稍東出序班舉玉帛案随之置丹墀
中道承制官稱有制贊禮贊跪宣制曰今聘某官某女
為某王妃命卿等行納徵禮贊禮贊俯伏興樂作四拜
平身樂止儀禮司奏禮畢駕興樂作鳴鞭樂止引禮引

玉帛案由奉天門東門及午門東門出置玉圭玄纁於綵輿執事官引文樓下儀物由午門東門出以次陳列正副使行至御橋外收服乘馬至妃家

妃家行納徵禮

前一日妃家設正副使幕次於大門外道左南向設香案於正堂中設受玉帛案於香案之南其日禮物至妃家引禮捧玉圭玄纁先行正副使隨之至幕次執事者陳禮物及冠服等物於正堂捧玉帛者俟於幕次東西

向禮官一員先入至正堂立於東西向主婚者出見立於東西向禮官曰奉制命正使某官某副使某官某為某王行納徵禮引禮引主婚者出迎引禮引正使捧玉圭副使捧玄纁先行主婚者隨行引禮引至正堂置玉圭玄纁於案正使立於案之左西南向副使立於案之右東南向贊禮引主婚者就拜位贊鞠躬四拜興平身贊詣前跪贊捧圭正使捧玉圭授主婚者主婚者受玉圭以授執事者執事者跪受興置於案贊捧帛副使捧

玄纁授主婚者主婚者受玄纁以授執事者執事者跪受興置於案贊主婚者俯伏興平身贊復位贊四拜興平身禮畢正副使出主婚者至正副使前致詞云請禮從者酒饌畢主婚者捧帛以勞正副使正副使出主婚者送至門外正副使詣皇帝前復命妃家回儀從西華門入內官監監官奏聞

發冊儀物

金冊一副

兩葉計足色金一百兩重造每葉高一尺二寸闊五寸周尺

藉冊錦一片

紅絹裏

聯貫冊葉

用紅絲條

墊冊錦褥一箇

紅絹裏

裹冊紅羅銷金小夾袂一條

渾金漉粉雲鳳冊盃一箇

內用紅紵絲發襯花銀釘鉸一副重一兩二錢嵌金絲鐵

鎖鑰

一副

覆盃紅羅銷金大夾袂一條

九暈四鳳冠一頂

冠上大花九樹小花九樹寶鈿九箇翠雲博鬢描金
珠皂羅額珠眉心珠牌環金冠上金鳳四箇

牌環脚一雙

翟衣三套描金雲鳳沈香色木匣一箇

銅鎖鑰索扛全

青紵絲繡翟衣一件青紵絲繡蔽膝一件

玉色線羅中單一件紅緣襪

青線羅繡翟衣一件青線羅繡蔽膝一件

玉色線羅中單一件紅緣襪

青紗繡翟衣一件青紗繡蔽膝一件玉色紗中單一件

青紅線羅銷金大帶一條上有青紵絲副帶一條
五色線錦綬一副上有玉環二箇青紅羅線結全

白玉鈎碾鳳文珮一副

玉事件二十件串珠全

金鈎子并圈二箇

五色線錦襯一副

白玉革帶一副

青紵絲裏裏描金文翟衣

玉事件一十件

金事件五件

青紵絲烏一雙

上有珠六顆

青羅襪一雙

紅羅銷金夾袂大小五條

包裏翟衣玉珮玉帶等物

鳳轎一乘

錦坐褥一箇

錦踏褥一箇

紅交床一把

紅穿條全

紅簾一扇

青羅銷金沿邊繡帶全

紅羅銷金轎衣一件

漚水頂罩全

紅羅絹銷金雨轎衣一件

漚水頂罩全

綵結四串抹金銀香圓寶蓋四副

計八件共花銀一十六兩

儀仗

紅杖二

清道旗二

絳引幡二

戟斨二

班劍二

結子絹袋全

儀刀二

結子紅絹袋全

梧杖二

絹袋全

鐙杖二

絹袋全

立瓜二

絹袋全

卧瓜二

絹袋全

骨朵二

絹袋全

響節四

絹袋全

紅繡傘一把

絹袋全

青方傘二把

絹袋拳全

紅繡團扇四把

絹袋全

青繡團扇四把

絹袋全

紅紗燈籠四箇

竿全

拂子二箇

結子全

坐障一

竿全

行障二

竿全

抹金交椅脚踏一副除木外計花銀一百兩重搭座
踏褥結子全

抹金銀水罐一箇重六十兩

抹金銀水盆一箇重六十兩

抹金銀水唾壺一箇重一十六兩

抹金銀唾盂一箇重一十六兩

抹金銀香爐一箇重一十六兩

抹金銀香合一箇重一十六兩

擎執官人銷金羅袍一十四領抹金釵花銀帶一十四

條翠花紗帽一十四頂皂鹿皮靴一十四雙

女轎夫衣袍一十六領汗跨一十六副銅束帶一十六

條花紗帽一十六頂紅綿布鞵鞋一十六雙

發冊命使儀注

其日清晨內官監錦衣衛尚寶司教坊司文武執事等
官於奉天殿陳設如納徵儀禮司設冊案於殿內之
東承制官持節官位於殿內之東西向設正使副使拜
位於丹墀正使在東副使在西錦衣衛設蓋冊黃傘一
於殿門外禮部陳設綵輿於午門外內官陳王妃鳳輦
儀仗於綵輿之南鼓三嚴引禮引文武官入就侍立位
鐘聲止儀禮司跪奏請陞殿皇帝服皮弁服導駕官奉
引如常儀樂作陞座止捲簾鳴鞭訖引禮引正正副使

各就拜位贊禮贊鞠躬樂作贊四拜平身樂止承制官
詣御前跪承制俯伏興由東門稍東出持節官舉節舉
冊官舉案隨行亦由東門稍東出校尉擎傘遮護冊行
至丹墀御道中持節官立於案東西向傳制官稱有制
贊禮唱跪宣制曰今冊某官某女為某王妃命卿等持
節行禮贊禮贊俯伏興鞠躬四拜興平身樂止持節官
以節授正使引禮引節冊及正副使由東道至奉天門
由東門出至午門外置冊於綵輿儀禮司官奏禮畢駕

興樂作百官捲班以次出儀仗鳳轎前行引禮引節及綵輿正副使隨行過御橋收服持節正副使俱上馬至妃府行冊禮

冊至妃家行禮儀注

是日妃府先設幕次於大門之外南向設案於正廳冊使至引禮引正副使至幕次禮官先入見主婚者禮官曰奉制命正使某官某副使某官某持節行冊禮主婚者出迎引禮引正使持節副使捧冊入主婚者隨行至

正廳正副使立於香案東南向引禮引主婚者至拜位
贊禮贊鞠躬四拜興平身退立於西南引禮引接冊內
官詣前贊禮贊舉冊副使以冊授內官內官跪受訖贊
禮贊請詣中堂行禮內使二人引捧冊內官入中堂正
副使仍前立候內官出告行禮畢正副使以節出主婚
者請禮正副使如納徵儀

受冊儀注

其日妃府陳設香案於中堂設冊案於香案之南設妃

拜位於冊案之南妃服翟衣訖俟內官捧冊入置於案
贊禮女官一員居東一員居西在妃拜位前相向立宣
冊女官展冊女官立於東引禮女官二員分左右引妃
出房至冊案前拜位女使執事者立於西贊禮女官贊
四拜興宣冊女官稱有制女官贊跪妃跪贊宣冊宣冊
女官詣冊案前取冊立宣於香案東女官宣冊訖以冊
入於盥贊受冊宣冊官捧冊立授妃妃受冊女官贊以
冊授執事者妃以冊授女使女使跪受興置於案女官

贊妃興又贊四拜禮畢內官出告正副使行禮畢執事者徹香案冊案設妃座引禮請妃陞座衆命婦及應賀者序立於庭北向贊四拜禮畢妃降座

催粧禮物

北羊二牽

紅綠絹銷金蓋袱二條

酒二十瓶

紅綠羅銷金蓋袱二十條每條陞角折二銅錢四箇

果二合

用花四枝

已上禮物內官一員送至妃家

鋪房

一妃家於親迎前擇日將房奩床帳等物至王府鋪房
禮部預先奏知至日妃家備鼓樂迎引從午門東角門
入鼓樂止於闕西妃母或親戚入內陳設

醮戒儀注

其日內官監設上位中宮御座於宮中設大樂儀仗於
丹陛之東西執膳內官先備酒金爵果合以俟上位服
皮弁服中宮燕居服出樂作陞座樂止王服袞冕贊引

引王由殿東門入詣上位前贊禮贊鞠躬樂作贊四拜
興平身樂止執事者以爵斟酒立於御前之東贊禮贊
王詣前跪贊搢圭贊受爵執事者以爵立授王王受爵
飲訖以爵授執事者執事者跪受以退贊禮贊出圭恭
聽戒命隨旨意致戒詞王聽戒詞訖贊俯伏興平身贊
復位贊鞠躬樂作贊四拜興平身樂止贊禮引王詣中
宮前禮同贊禮畢引禮引王出收衮冕具皮弁服行親
迎禮

妃受醮戒儀

親迎日妃家先於祠堂陳設祭物妃服燕居冠服妃父母同妃詣祖宗前奠酒讀祝禮畢執事者具酒饌命妃飲食訖父母坐於正堂女執事引妃詣父母前各四拜父母隨意致戒辭妃聽受訖次辭諸尊長禮畢改服翟衣以俟

親迎儀注

其日儀衛司先設王儀仗象輅於承天門外妃家先設

王幕次於中門之外設香案帛案於正堂之中是日王受命訖引禮引王由午門東門出典儀具服跪請陞輅儀從前導過御橋樂作至妃家門外引禮跪請王降輅導引至幕次禮官一員先入至正廳立於東西向主婚者出見立於西東向禮官曰某王制奉行親迎禮引禮二人具服引主婚者迎王於幕次之外內官二員具服引王出幕次主婚者請王入中堂王先行主婚者後隨內官具服捧禮物入至於中堂主婚者進立於中堂之

左妃毋立於堂中之右東西相向王至中堂女執事二人引妃出房立於妃母之下內官引王至案前內官捧帛進王王以帛置於案內官引王稍退近東西向立贊禮引主婚者詣帛案前行八拜禮退復位執事者徹案引禮內官導王先出女轎夫舉鳳轎至於中門之內內官具妃儀伏於中門之外女執事引妃出內官跪啓請王詣轎所啓請揭簾妃陞轎內官啓請王陞輅前行妃具儀從後行王至承天門外降輅候妃至內官跪啓請

王揭簾妃降轎王先行至內釋皮弁服具袞冕至奉先殿前俟妃入午門陞轎將至奉先殿降轎行廟見禮

廟見儀注

是日內官于奉先殿陳設牲醴祝帛訖每廟猪一羊一帛二共一篚祝共一贊引二人引王二人引妃至奉先殿詣德祖玄皇帝皇后神御前王在東妃在西贊王與妃皆兩拜贊跪王跪妃亦跪贊搢圭王搢圭贊進帛執事者以帛跪進於王右贊受帛王受帛以授執事者贊

奠帛執事者以帛奠神御前贊進爵執事者以爵跪進於王右贊受爵王爵爵以授執事者贊獻爵執事者以爵奠於玄皇帝皇后前贊再進爵執事者以爵進贊受爵王受爵以授執事者贊獻爵執事者以爵奠於玄皇帝皇后前贊俯伏興王俯伏興妃亦興贊王復位贊王與妃皆兩拜平身次詣懿祖皇帝皇后熙祖皇帝皇后仁祖皇帝皇后儀同上贊詣讀祝位王詣讀祝位贊跪王跪妃亦跪讀祝訖贊俯伏興平身王俯伏興平身妃

亦興贊王復位贊王與妃皆兩拜平身贊執事者捧祝帛各詣燎所贊詣燎位王與妃詣燎位贊禮畢引禮引王及妃還宮行合巹禮

合巹儀注

其日內官先於王宮設王座於東西向設妃座於西東向各設拜位於座之南設酒案於正中稍南置兩爵兩巹於案上執事者啓請王具皮弁服訖贊引導王與妃至宮門贊引二人導王前陞二人導妃後陞贊請就拜

位王與妃各就拜位贊兩拜王與妃皆兩拜訖贊請陞座王與妃皆陞座執事者二人舉饌案進於王及妃之前女官司尊者取金爵盞酌酒以進王與妃各受爵飲訖女官進饌王與妃皆舉饌訖女官再以金爵進酒王與妃皆飲訖女官進饌王與妃皆舉饌訖女官再以盞盞酌酒合和以進王與妃皆飲訖又進饌王與妃皆舉饌凡三舉酒饌畢執事者徹饌案贊王與妃興就拜位相向贊兩拜禮畢王從者餽妃之饌妃從者餽王之饌

朝見儀注

第二日清晨王冕服妃翟衣贊引各啓請出宮至宮門外以俟皇帝服皮弁服中宮服燕居服陞座贊引引王及妃自東門入王先入妃從之贊禮贊詣皇帝前王立於東妃立於西宮人以棗栗盤立於妃之右贊王與妃皆四拜執事者二人舉案至皇帝前宮人以棗栗盤授妃妃捧棗栗盤置于案上執事者舉案妃隨捧進至皇帝前妃復位贊禮贊王與妃皆四拜興贊引引王及妃

詣皇后前宮人以服脩盤立於妃左贊王與妃皆四拜
興執事者二人舉案至皇后前正中宮人以服修盤授
妃妃捧服修盤置於案上執事者舉案妃隨舉進至皇
后前妃復位贊四拜王與妃皆四拜興執事者以皇帝
前案栗案徹於東皇后前服修案徹於西贊禮畢贊引
引王及妃出是日賜王與妃宴

盥饋

第三日清晨妃服翟衣贊引引妃出陞輿將至宮內門

降輿由東門入俟膳至贊引引妃詣皇帝前贊四拜尚
食以膳授妃妃捧膳置於案復位又贊四拜贊引引妃
詣皇后前禮同贊引引妃退立於西南俟膳畢贊引引
妃出

王與妃見東宮儀注

是日王與妃朝見訖王具皮弁服妃服翟衣詣東宮前
行四拜禮東宮皮弁服坐受東宮妃翟衣立受兩拜答
兩拜

回門禮物

花銀三百兩重

雜色紵絲三十二疋

紅綠羅銷金束子九十六箇

北羊四牽

紅綠絹銷金蓋被四條紅麻索四條

酒四十瓶

紅綠羅銷金蓋被四十箇

果四合

回門儀注

其日內官先將禮物至妃家王與妃儀仗導從如常儀

王先行至妃府妃父出迎王先入妃父從之至正廳王立東西向妃父立於西東向王於妃父母前行四拜禮妃父母立受兩拜答兩拜禮畢王中坐其餘親屬見王行四拜禮王皆坐受妃至入中堂於父母前行四拜禮父母正面坐受其餘親屬見妃各序家人禮

王府供用器皿

金器

壺瓶一對六十兩重

酒注一對六十兩重

孟子一對二十兩重

贄禮盤二面六十兩重

盤盞二副二十兩重

托裏胡桃木椀四箇六十四兩重

椶邊胡桃木托子四箇五兩重

托裏胡桃木鍾子一對一十一兩重

撒盞一對八兩重

葫蘆盤蓋一副一十兩重

茶匙一雙一兩重

匙一雙五兩重

筯一雙五兩重

銀器

果合一對一百六十兩重

汁瓶二對一百兩重

茶瓶一對五十兩重

湯鼓四箇八十兩重

按酒櫟一十二箇四十二兩重

果櫟一十二箇三十兩重

菜櫟一十二箇二十四兩重

漆器

硃紅餞金大托盤二面

紅紗罩二

硃紅餞金饅頭肉盤四箇

紅紗罩二

小車子一乘貼金釘鉸金井頂上抹金銅火珠一箇

四角銅鳳四箇

紅紵絲車衣一副頂裙瀝水頂裏紫羅帶全

錦坐褥一箇黃綿布骨子黃絹裏綿花裝

紅平羅車衣一副頂裙瀝水頂裏絹紫羅帶全

錦靠褥二箇綠紵絲邊黃綿布骨子黃絹裏綿花裝

紅素油絹雨衣一副

紅油儀仗木架二座

明會典卷六十六

欽定四庫全書

明會典卷六十七

禮部二十六

婚禮二

洪武二十七年更定凡親王納妃預擇親迎日期別擇
日行定親納徵發冊催粧等禮其禮物仍依節次名數
同日給送

納徵發冊催粧

前期一日內官監禮部儀禮司設冠服首飾金銀段疋等儀物于文樓下設玉帛案冊案并節于奉天殿內至日早禮部設綵輿教坊司設樂于午門外內官設王妃鳳轎儀仗于綵輿之南皇帝具皮弁服陞殿百官侍班正副使先行四拜禮執事官舉節及玉帛案冊案至丹墀置案于中道持節俟立傳制官宣制曰今聘某官某女為某王妃令卿等行納徵發冊等禮正副使又四拜禮畢執事官以節授正使引禮引節并玉帛案冊案冠

服等物至午門外置冊及玉帛於綵輿冠服等物以次陳列而行

妃家受聘

前期一日妃家設香案節案于正堂中玉帛案冊案左右相向至日禮物至妃家主婚者出迎引禮引正使持節副使捧冊執事者捧玉帛至正堂各置于案正副使立于案左右冠服等物以次陳列禮官一員立於左主婚者立於右禮官曰奉制命正使某官某副使某官某

為某王行納徵發冊等禮引禮引主婚者詣香案前行
四拜禮執事官捧玉圭玄纁主婚者先受玉圭次受玄
纁各授執事再行四拜禮畢內官先以冠服進于妃具
服訖內官詣冊案跪捧冊入中堂置于案引禮女官引
妃出至冊案前行四拜禮跪女官宣冊訖妃受冊以授
執事者再行四拜禮畢執事者設妃座引禮請妃陞座
妃家應賀者行四拜禮正副使俟內官出告行禮畢持
節出主婚者送至門外正副使回朝復命妃家回奉禮

物從午門入內官監官奏聞

醮戒

其日皇帝具皮弁服執膳內官備金爵酒果王具冕服
行四拜禮執事者斟酒立授王王跪飲聽戒命訖再行
四拜禮復詣皇后前禮同

親迎

前一日妃家令親人鋪房至日王親迎儀衛司先設王
儀伏教坊司設樂于長安門外妃家先設王幕次于中

門之外香案帛案于中堂是日王受戒命訖具皮弁服
陞輦至妃家幕次禮官先入正廳立于東主婚者立于
西禮官曰某王奉制行親迎禮主婚者詣幕次迎王王
前行主婚者後隨至中堂內官捧禮物入中堂主婚者
立於左妃母立於右女執事二人引妃出立于妃母之
下內官以帛進王王受帛置于案王立于案左贊禮引
主婚者詣帛案前行八拜禮畢引禮內官引王先出中
門外詣妃轎所揭簾妃陞轎王陞輦前行妃具儀從後

行王至長安門外降輦候妃至揭簾妃降轎王先行至
內釋皮弁服具袞冕與妃詣奉先殿行禮

廟見

是日內官先于奉先殿陳設牲醴祝帛訖引禮引王與
妃詣四廟帝后神御前行四拜禮獻帛獻爵讀祝訖又
行四拜禮畢還宮

合巹

其日內官先於王宮設王座妃座東西相向各設拜位

于座之南王具皮弁服妃服鞠衣行拜禮王再拜妃俠拜執事者設酒案于正中饌案于左右置兩爵兩盞于酒案王與妃陞座執事者舉饌案進于王及妃之前女官以爵進酒王與妃飲訖進饌饌訖再進酒饌如前儀又以盞盞斟酒進皆飲訖進饌皆饌訖徹案王從者餞妃之饌妃從者餞王之饌

朝見

次日早王具冕服妃具霞帔褙子皇帝服皮弁服引禮

引王與妃詣御前宮人以棗栗盤立于王妃之右王與妃各行四拜禮執事二人舉案妃隨捧進至御前王與妃又行四拜禮復詣皇后前獻服修如前儀禮畢賜王與妃宴

回門

其日內官先以禮物至妃家王與妃導從如常儀王先至妃家妃父出迎至正廳王于妃父母前行四拜禮妃父母立受兩拜答兩拜王至中堂坐其餘親屬見王行

四拜禮妃至入中堂於父母前行四拜禮其餘親屬於
妃前行家人禮

弘治中續增醺戒等儀其納徵日上先具衮冕詣奉先
殿用樂祭告禮畢然後易皮弁服傳制其醺戒儀是日
內執事設太皇太后皇太后御座于宮中設大樂儀伏
于丹陛之東西執膳內官先備酒金爵果合以俟太皇
太后具燕居服樂作陞座樂止王服衮冕贊引引王由
東門入詣太皇太后前贊鞠躬樂作贊四拜興平身樂

止執事者以爵斟酒立于東贊禮贊王詣前跪贊搢圭
贊受爵執事者以爵立授王王受爵飲訖以爵授執事
者執事者跪受以退贊出圭恭聽戒命往迎尔相用成
厥家勉率以敬為國之光王聽戒辭訖贊俯伏興平身贊
復位贊鞠恭樂作贊四拜興平身樂止贊禮畢贊禮引
王詣皇太后宮門外由東門入詣皇太后前贊鞠躬樂作
贊四拜興平身樂止執事者以爵斟酒立于東贊禮贊
王詣前跪贊搢圭贊受爵執事者以爵立授王王受爵

飲訖以爵授執事者執事者跪受以退贊禮贊出主恭
聽戒命往迎尔相承厥家事勉率以敬無忝戒命王聽
訖贊俯伏興平身贊復位贊鞠躬樂作贊四拜興平身
樂止贊禮畢贊禮引王詣上位宮門外候上具常服皇
后具燕居服陞座贊禮引王詣上位前行五拜三叩頭
禮畢引王出釋袞冕具皮弁服行親迎禮其妃受醮戒
儀親迎日妃家先于祠堂陳設祭物妃服燕居冠服妃
父母同妃詣祖宗前行禮奠酒讀祝禮畢執事者具酒

饌于內進妃飲食訖父母坐于正堂女執事引妃詣父母前各四拜父母隨意致戒辭妃聽受訖次詣諸尊長行禮畢改服翟衣以俟親迎其朝見儀第二日清晨王冕服妃翟衣贊引各啟請出宮至皇城内宮門外以俟太皇太后燕居服陞座贊引引王及妃自東門入王先入妃從之贊禮贊引詣太皇太后前王立于東妃立于西宮人以服脩盤立于妃之左贊王與妃皆四拜執事二人舉案至太皇太后前宮人以服脩盤授妃妃捧服

脩盤置于案執事者舉案妃隨案進至太皇太后前妃復位贊王與妃皆四拜興執事者徹殿脩盤案于東贊禮畢引王與妃出詣皇太后宮前俟皇太后燕居服陞座引禮引王及妃自東門入詣皇太后前進殿脩盤行禮同前畢出詣上位宮前俟上具常服陞座贊引引王及妃自東門詣上位前進棗栗盤皇后前進殿脩盤行禮同前畢贊引引王及妃出是日賜王與妃宴王與妃見東宮是日王與妃朝見訖王具皮弁服妃服翟衣詣

東宮前行四拜禮東宮皮弁服坐受其盥饋儀第三日
清晨妃服翟衣贊引引妃出陞輿將至宮內門降輿由
東門入俟膳至贊引引妃詣太皇太后前贊四拜尚食
以膳授妃妃捧膳置于案復位又贊四拜贊引引妃退
立于西南俟膳畢引妃出詣皇太后前行禮同復詣上
位前皇后前行禮同

明會典卷六十七

欽定四庫全書

明會典卷六十八

禮部二十七

婚禮四

公主婚禮

諸司職掌

冊公主

前期告奉先殿 用祝帛猪羊行禮如常儀

冊文

維洪武某年歲次某某月某日皇帝制曰古之君天下

者有女必封爾長次女今已成人未有封號特以某郡為

爾之號配某官某之子彼為駙馬爾為公主既入某官
之門恪遵婦道以奉舅姑閨門整肅內助長佳毋累父
母生身之恩爾惟敬哉

謁廟

受冊次日引禮引公主謁奉先殿

用香燭

駙馬受誥

其日駙馬受誥如常儀

誥文

夫婦之道人之大倫婚姻以時禮之所重帝女下嫁必
擇勲舊為姻此古今通義也朕今命爾為駙馬都尉當
堅夫道毋寵毋慢永肅其家以稱親親之意恪遵朕言
勿怠

公主受醮戒

其日早公主具禮服辭奉先殿申時內官陳設儀仗于正
宮內丹陛之東西大樂陳于丹墀執事女官備金爵酒
壺果合以俟內贊女官二員于殿之東西皇帝常服皇
后燕居服陞座公主具禮服引禮女官引公主詣皇帝
前贊拜樂作四拜樂止贊跪贊受爵女官以爵斟酒立
授公主公主受酒飲訖以爵授執事者執事者跪受虛
爵退復位贊恭聽戒命

隨吉意訓戒

公主聽受訖贊興

贊復位贊拜樂作四拜興樂止引禮女官又引公主詣

皇后前贊拜樂作四拜興樂止贊跪贊受爵執事女官
斟酒立授公主公主受酒飲訖以爵授執事者跪受虛
爵以退贊恭聽戒命

隨吉意訓戒

公主聽受訖贊興贊

復位贊拜樂作四拜興樂止禮畢公主換燕居冠服命
婦送至宮門引禮引公主由宮門東門出過宮門西上
陞輦至右門內公主降輦駙馬揭簾公主陞轎內使備
儀仗鼓樂前導合女樂三十六人接引至府公侯百官
命婦送至府各回家

駙馬受醮戒

其日早駙馬父與駙馬具家用祭服告祠堂畢至午後
駙馬父坐于正堂駙馬具見尊長服引禮引駙馬至拜
位贊鞠躬兩拜興平身贊跪贊搢笏贊受爵執事者斟
酒授駙馬駙馬受酒飲訖以爵授執事者贊聽訓戒駙
馬父隨意致戒辭

駙馬聽訖贊出坊俯伏興贊復位贊

鞠躬兩拜興平身禮畢駙馬便服上馬行親迎禮若駙

馬父母俱存則父母同坐于正堂行禮如前儀

親迎

其日駙馬受醮戒訖具儀從鼓樂前導至午門西下馬
至朝房具朝服候申時序班二人具服引駙馬由午門
西角門入至右紅門內官二員具服接引駙馬至內使
監前候報公主醮戒將畢引駙馬至右門西東向立公
主至駙馬揭簾公主陞轎駙馬先由午門西角門出至
上馬處上馬先至府候公主至揭簾公主降轎同謁祠
堂

謁祠堂

執事者先於祠堂設祭物畢引禮女使引駙馬及公主至祠堂拜位駙馬立于東公主立于西贊禮贊鞠躬拜駙馬公主皆兩拜引禮引駙馬詣高祖考妣神位前公主仍立於拜位贊跪駙馬跪公主亦跪贊搢笏駙馬搢笏贊進爵執事者以爵跪進于駙馬右贊受爵駙馬受爵以授執事者贊獻爵執事者以爵奠于高祖考神位前贊再進爵執事者以爵進贊受爵駙馬受爵以授執事

者贊獻爵執事者以爵奠于高祖妣神位前贊出笏俯
伏興公主亦興引禮又引駙馬詣曾祖考妣祖考妣各
神位前如前儀訖贊詣讀祝位駙馬至讀祝位贊跪駙
馬跪公主亦跪讀祝訖俯伏興公主亦興贊復拜位贊
拜駙馬公主俱兩拜禮畢導還府行合巹禮

合巹

其日女使陳設駙馬座于室東西向公主座于室西東
向各設拜位于座之南設酒案于室中稍南置兩盞兩

色

即葫蘆盞

于案上饌案二于室中贊引二人導駙馬

二人導公主就拜位贊兩拜駙馬公主相向皆兩拜請
就位駙馬公主各就位執事者奉饌案置于駙馬公主
前執事者二人以二盞斟酒以進駙馬公主皆飲酒執
執事者進饌駙馬公主皆舉筯執事者再斟酒駙馬公
主皆飲酒執事者再進饌駙馬公主皆舉筯執事者以
兩色盞斟酒合和以進駙馬公主皆飲訖執事者又進
饌駙馬公主皆舉筯執事者徹饌案贊駙馬公主興就

拜位駙馬公主相向皆兩拜禮畢

見舅姑

一公主見舅姑舅姑坐于東西向公主立于西東向行
四拜禮舅姑答兩拜

賜駙馬冠帶衣服

紗帽一

金帶一

後以玉帶

紵絲羅衣各一襲
斜皮靴一雙

鞍馬二

明會典卷六十八

欽定四庫全書

明會典卷六十九

禮部二十八

婚禮五

品官納婦

明集禮

凡品官婚娶或為子聘婦先遣媒氏通書次遣使及媒氏行六禮婦至婿家主人饗宴送者明日謁見祖禰訖

次見舅姑行盥饋之禮舅姑饗婦如家人之儀

納采

前一日主婚者設賓次於大門外賓席於廳事至日設
鴈及禮物於廳及庭媒氏省視訖執事者舉禮物進賓
及媒氏從其後質明主婚者具祝版告廟以行賓至女
第媒氏入告贊者延賓入次執事者各陳禮物于大門
內女氏主婚者公服出迎於大門外贊者引賓出次主
婚者揖賓入賓及媒氏陞自東階主婚者陞自西階至

廳賓立於左主婚者立於右媒氏立於賓之南執事者各陳其物於廳及庭賓及主婚者皆再拜賓請主人曰某官以伉儷之重施於某某率循禮典謹使某納采主婚者曰某之子弗閑姆訓既辱采擇敢不拜嘉主婚者揖賓就西向坐主婚者東向坐執事者徹禮物訖賓復入陳鴈及禮物於廳賓詣主婚者曰某官慎重婚禮將加卜筮請問名主婚者進曰某第幾女某氏出或以紅羅或以銷金紙書女第行年歲賓辭將降出主婚者曰

請禮從者賓復就坐遂行飲食之禮畢賓降自東階出
主婚者送至大門外

納吉

禮如納采儀賓致辭曰某官承嘉命稽諸卜筮龜筮協
從使某告吉主婚者曰某未教之女既以吉告其何敢
辭

納徵

禮如納吉儀加玄纁束帛函書賓致辭曰某官以伉儷

之重加惠某官率循典禮有不腆之幣敢請納徵主婚者曰某官貺某以重禮某敢不拜受辭畢賓即函書授主婚者主婚者受書以授執事者主婚者之從者亦以函書進授主婚者主婚者受以授賓賓受書以授左右訖主婚者揖就席主婚者之執事者各徹禮物

請期

亦與納吉同

迎親

前一日主婚者設次於大門外其日婿父公服告于禰廟質明婿具公服親迎執事者設婿父位於廳之正中婿父即座贊者引婿陞自西階至父座前北面再拜進立父位前父命之曰躬迎嘉偶釐尔内治婚進曰敢不奉命退復位再拜媒氏導婿之女家其日女氏主婚者公服告廟訖宴會親戚醴女如家人禮婿至門外下馬媒氏入告贊者引婿就次女從者請女盛服就寢門内南坐贊者引婿出次主婚者出迎婿于大門之東西面

揖婿入主婚者入門而右婿入門而左執鴈者從婿後至寢戶前北面立主婚者立於寢戶之東西向執鴈者陳鴈於庭婿再拜婿出就次主婚者不降送婿既出女父母就正廳南向坐保姆引女就父母座前北面四拜父命之曰往之女家以順為正無忘肅恭母命之曰必恭必戒毋違舅姑之命庶母申之曰尔悅聽於訓言母作父母羞保母及侍女導從女出門陞車儀衛導前應送者乘車從後婿先還以俟

同牢儀

女將至婿家執事者設座於寢室內婿東婦西設婿洗一於室之東南婦洗一於西北酒案於室之南楹正中設四爵兩盃於酒尊之北食案二於酒案之北初婚婦車至門保姆請下車贊者引婿出迎於大門內婿婦同入及寢門婿先陞階保姆等導婦後陞入室婿盥於南洗婦從者執巾進水以沃之盥畢從者請婿婦各就座執事者各舉食案於婿婦之前司尊者注酒侍女以酒

置于案上婿婦飲訖徹觥司饌者進饌侍女供饌於案
婿婦饌訖徹饌再飲再饌如初侍女以盃注酒進於婿
婦前各飲畢贊者請皆興立于座南東西相向贊拜婿
婦皆再拜侍從引婿婦入室易服婿從者餞婦之餘婦
從者餞婦之餘

廟見

婦至之明日見宗廟設主婚者拜位於東階下婿拜位
於其後主婦拜位於西階下婦拜位於其後諸親拜位

男女各於主婚者及主婦後其日婦夙興沐浴盛服主婚者及主婦皆盛服各就位再拜贊者引婦進詣庭中北面立主婚者陞自東階詣神位前跪三上香三祭酒讀祝興主婚者立於神位西婦四拜退復位主婚者降自東階就拜位主婚者以下皆再拜禮畢

見舅姑

婦既謁廟見舅姑執事者先設舅姑位於堂上舅在東姑在西婦沐浴盛服立於堂下俟舅姑即座贊者引婦

就拜位四拜保姆引自西階至舅前侍女捧棗栗授於婦婦受之置位前案上降階復四拜訖詣姑前奉服脩如舅前儀執事者各徹訖婦退降自西階至庭下拜四拜禮畢婦退舅姑醴婦如家人禮

盥饋

婦見舅姑之明日行盥饋禮其日婦家備盛饌至婿家婦從者設舅姑位於堂上食案於堂中婦夙興沐浴盛服立于庭下舅姑即座婦四拜保姆引婦陞自西階至

舅位之南婦從者舉食案於舅前執事以饌授婦婦奉饌置於舅前執事者加匕筯進饌於姑亦如之食訖婦從者徹饌婦降階就拜位四拜禮畢舅姑醴婦如初見禮

舅饗丈夫送者

其日質明主婚者命執事者設賓席於正廳東西相向其席位從其賓之數設酒案於廳之南楹設食案於酒案之北賓至掌次者引賓先就次主婚者出迎於大門

之外引禮者引賓出次主婚者揖賓入賓升東階主婚者升西階至廳分東西相向立贊禮唱鞠躬再拜賓主皆再拜平身主婚者揖賓各就座執事者舉食案進供於賓客主婚者之前進酒進饌如常儀會畢賓主俱興賓立於東階上西向主婚者立於西階上東向執事者奉幣以授主婚者主婚者以授賓賓受以授左右降自東階從者受幣以從賓出主婚者送於大門之外

姑饗婦人送者

其日主婚者之執事者設女賓次於中門之內設女賓席於後堂東西相向設女賓親黨位於女賓之南西向設主婦親黨位於主婦之南東向設酒案於堂之南楹設食案於酒案之北女賓至掌次者引就次主婦出迎於次外引贊引女賓出次主婦接女賓同入女賓升東階主婦升西階至廳分東西相向立女贊唱再拜女賓及主婦皆再拜主婦請女賓皆就位坐侍女舉食案進供於女賓主婦之前進酒進饌如常儀會畢女賓及主

婦皆興執事者奉幣以授主婦主婦受幣以授女賓女
賓授幣降自西階以授從者從者奉幣以從女賓出主
婦送於門外

庶人納婦

明集禮

凡男年十六女年十四以上並聽婚娶先遣媒氏通言
女氏許之次命媒氏納采納幣至期婿盛服親迎主婚
者禮賓明日婦見祖禰畢次見舅姑婿往見婦父母

納采

是日夙興主婚者告於祠堂云某人之子某年已長成

未有伉儷已議娶某郡某之女今日納采不勝感愴

若宗

子自昏則自告

媒氏奉書及禮物往女家至大門外主婚者出

迎媒氏媒氏入門而右主婚者入門而左升堂東西相

向立執事陳禮物於堂上及庭中媒氏進詣主婚者曰

吾子有惠貺室於某某親某有先人之禮使某請納采

主婚者對曰某之子蠢愚又弗能教吾子命之某不敢

辭從者以書進授媒氏媒氏奉書以授主婚者主婚者受書以授左右訖延媒氏就次執事者各徹禮物主婚者遂奉書告於祠堂訖出迎媒氏升堂從者以復書進授主婚者主婚者以授媒氏媒氏受書以授執事訖請退主人請媒氏以酒饌請從者於別室皆酬以幣使者復命婿家婿家復告祠堂

納幣請期

古有問名納吉朱子家禮止用納采納幣以從簡便

其日婿氏主婚者備書及禮物於庭媒氏省視訖遂奉

書及禮物至女家主婚者出迎媒氏入門而右主婚者
入門而左升堂東西相向立從者陳禮物於堂及庭中
媒氏進詣主婚者前曰吾子既修好於某某使某來成
主婚者曰備禮有加敢不重拜從者以函書授媒氏媒
氏以授主婚者主婚者受書以授左右訖左右以復書
進授主婚者以授媒氏媒氏受書復致命曰某使某請
吉日主婚者曰某固聽命媒氏曰請以某甲子主婚者
曰敢不承命媒氏請退主婚者留媒氏宴饗如納采之

儀

親迎

有故聽以媒氏往迎

前期一日女氏使人張陳其婿之寢室

俗謂之鋪房

其日質

明婿父盛服以祝告廟訖父坐於正廳中間南向子盛

服

品官子孫假九品服餘皂衫折上袷

立於父位之西少南東向贊禮唱

鞠躬拜興拜興平身婿鞠躬拜興拜興平身執事者以

醖注酒授婿婿祭酒少許訖啐酒以醖授從者訖興平

身進立於父位前父命之曰釐爾內治往求爾匹婿進

曰敢不奉命贊禮唱鞠躬拜興拜興平身婿鞠躬拜興
拜興平身降出乘馬以二燭前導至女家司賓延入次
是日女父母請親戚宴女如家人之儀婿至主婚以祝
告於祠堂曰某之第幾女將以今日歸于某不勝感愴
告祝訖出迎婿於中門之外揖婿入主婚者升東階西
向婿升西階進當寢戶之前北面執鴈者陳鴈於階庭以無鴈他
物婿曰某受命於父以茲嘉禮恭聽成命主婚者曰某固
願從命贊禮唱鞠躬再拜平身婿鞠躬再拜平身贊禮引

婿降階出至次以俟主婚者不降送婿既出就次女父母盛服向南坐侍女導從女至堂上詣父母前北面立贊者唱四拜女四拜父戒之曰往之爾家無忘肅恭毋戒之曰夙夜以思無有違命諸母申之曰無違尔父母之訓贊者又贊四拜女四拜興訖侍女導從出門升輿二燭導行婿先乘馬還俟於門外婦至門外贊者請降輿婦降輿入門北面立婿出至中門外南面揖婦同入室婦從者布婿席於室東婿從者布婦席於室西贊者

引婿婦至席所東西相向贊禮唱拜興拜興婿婦皆再拜婿揖婦就坐婦從者舉食案置於婿前婿從者舉食案置於婦前婦從者斟酒進供於婿婿受醖飲酒畢從者以饌進婿婦皆饌再飲再饌畢婿從者以盃斟酒進授婿婿受盃婿從者以盃斟酒進授婦婦受盃同飲畢婿婦皆興入寢室婿脫服婦從者受之婦脫服婿從者受之婿從者餞婦之餘婦從者餞婿之餘主婚者禮男送者於外廳主婦

禮女送者於中堂各如儀

見舅姑

婦至之明日謁見舅姑其日夙興盛服立於堂下舅姑坐於堂上舅位在東姑位在西置卓子於舅姑之前家人男女少於舅姑者立於兩序侍女引婦立於東階下贊禮唱四拜婦四拜侍女引婦升東階至舅位前侍女以贄幣進授於婦婦受贄幣奠於卓子上舅撫之侍女引婦降階北面立贊禮唱四拜婦四拜侍女引婦就西

階下立贊禮唱四拜婦四拜侍女引婦升西階至姑位
前侍女以贊幣進授於婦婦受贊幣進奠於卓子上姑
撫之侍女引婦降階北面立贊禮唱四拜婦四拜贊禮
唱禮畢舅姑醴婦如家人之儀

見祖禰

古者三月而廟見朱子家禮以其太遠改用三日

婦至之明日見於祖禰

無廟者設神位於廳事中

設主婚者拜位於

東階下北面婿拜位於後設主婦拜位於西階下婦拜
位於其後親屬拜位各以序分立於主婚者主婦之後

其日婦夙興沐浴盛服主婚者及主婦皆盛服贊禮
引主婚者就東階下位次引主婦就西階下位次引
諸親及婿婦各就位立定贊禮唱再拜平身主婚者
以下皆再拜平身贊禮引婦進詣庭中北面立引禮
引主婚者升自東階詣神位前引禮唱跪主婚者跪
引禮唱上香上香三上香司香者奉香進於主婚者
左主婚者三上香訖引禮唱祭酒祭酒三祭酒司尊
者以酒進于主婚者之左主婚者祭酒畢引禮唱讀

祝讀訖引禮唱俯伏興平身主婚者俯伏興平身引禮
引主婚者立于神位之西贊禮唱四拜婦四拜訖退復
位引禮引主婚者降自東階就拜位贊禮唱鞠躬再拜
平身主婚者以下皆鞠躬再拜平身贊禮唱禮畢主婚
者以下皆退

婿見婦之父母

婦至之明日婿盛服往見婦之父母至大門外立伺贊
禮者先入告婦父母出迎於大門外揖婿入從者執幣

其後婦父升自西階婿升自東階至廳東西相向婦父在西婿在東贊禮唱鞠躬四拜平身婿四拜興平身婦父扶婿興從者以幣進授婿婿受幣進於婦父婦父受幣以授左右贊禮引婿入至後堂門外少伺從者執幣以從婿母盛服出後堂南向立贊禮引婿入堂前楹北向立贊禮唱鞠躬四拜平身婿鞠躬四拜興平身婦母答拜訖從者以幣授婿婿受幣進授婦母之左右訖贊禮引婿出次見婦黨諸親皆如賓客相見之禮婦家設

酒饌禮婿各隨貧富之儀

饗送者

其禮如品官饗送者之儀

明會典卷六十九

欽定四庫全書

明會典卷七十

禮部二十九

宴禮

大宴儀一

諸司職掌

一是日尚寶司設御座于奉天殿錦衣衛設黃麾于殿外之東西金吾等衛設護衛官二十四員于殿東西教

坊司設九奏樂歌于殿內設大樂于殿外立三舞雜隊于殿下光祿寺官設酒亭于御座下之西膳亭于御座下之東珍羞醢醢亭于酒膳亭之東西設御筵于御座之東西設群臣四品以上位于殿內之東西設群臣酒尊食卓于殿外設五品以下位卓于東西兩廊司壺尚食各供乃事引禮引羣臣殿外東西相向立儀禮司跪奏請陞座駕興大樂作陞座鳴鞭樂止鳴贊引文武官四品以上由東西門入至殿中橫班北向立五品以下

官列于殿外丹墀北向立樂作贊四拜樂止光祿寺官
進御筵大樂作捧案至御前樂止進花樂作進訖樂止
光祿官開爵注酒捧詣御前進第一爵酒贊內外官皆
跪教坊司跪奏進酒飲畢贊衆內外官俯伏興樂作贊
四拜平身樂止贊各就位序班隨進羣臣卓散花樂作
散訖樂止序班即進群臣蓋第二爵酒教坊司跪奏二
奏皇風之曲樂作光祿司官斟酒御前序班隨斟羣臣
酒教坊司跪奏進酒候皇帝舉酒羣臣以次舉飲訖樂

止光祿官進湯鼓吹響節前導至殿外鼓吹止殿上樂作羣臣起立光祿司官進湯御前羣臣復位序班即供羣臣湯樂止教坊司跪奏進湯樂作候皇帝舉觴羣臣次舉皇帝進湯訖贊饌成樂止武舞入教坊司跪奏平定天下之舞舞畢出第三爵酒教坊司跪奏三奏春皇明之曲樂作進酒如前儀樂止教坊司跪奏樂奏撫安四夷之舞舞畢出第四爵酒教坊司跪奏四奏天道傳之曲樂作進湯如前儀食畢教坊司跪奏樂奏車書會

同之舞舞畢出第五爵酒教坊司跪奏振皇綱之曲進
酒如第三爵儀飲畢教坊司跪奏百戲承應舞畢出第
六爵酒教坊司跪奏六奏金陵之曲進酒進湯如前儀
教坊司跪奏八蠻獻寶進呈舞畢出第七爵酒教坊司
跪奏七奏長揚之曲進酒如前儀教坊司跪奏採蓮隊
子呈應畢出第八爵酒教坊司跪奏八奏芳醴之曲進
酒進湯如前儀食畢教坊司跪奏魚躍于淵呈應畢出
第九爵酒教坊司跪奏九奏駕六龍之曲進酒如前儀

飲訖光祿司官收御前爵序班隨收群臣盞光祿司官
進湯進大膳大樂作羣臣起立進訖復坐序班隨供羣
臣飯教坊司跪奏進膳食訖贊膳成樂止光祿司官收
膳訖教坊司跪奏百花隊舞呈應舞畢出鳴贊唱徹案
序班徹群臣卓訖光祿司官即徹御案贊宴成羣臣皆
出席北向立序班即徹羣臣座殿外官皆詣丹墀北向
立贊鞠躬樂作贊四拜平身樂止羣臣分東西立儀禮
司跪奏禮畢駕興大樂作鳴鞭百官以次出

中宴

一凡中宴禮儀同前但進酒七爵

常宴

一凡常宴同中宴禮儀但百官一拜三叩頭進酒或三爵或五爵而止

一凡文武官每遇筵宴四品以上官文東武西各照品級上殿侍座五品以下於殿下丹墀內文東武西各照品級序坐其奉特旨賜殿內坐者不在此限如在奉天

門則四品以上官坐于門上五品以下坐于丹墀內務
要容止恭肅不許攙越誼譁

禮儀定式

一凡百官于奉天華蓋謹身武英等殿筵宴奏事須穿
履鞋方許上殿違者從禮部官監察御史儀禮司糾舉
送法司如律

續定大宴儀

是日陳設如前儀駕自右順門至奉天門丹陛大樂作

陞座鴻臚寺官贊拜百官四拜興平身樂止光祿寺官
進御筵內官捧案進膳樂作設案畢樂止內官進花進
膳樂作進訖樂止教坊司跪奏一奏上萬壽之曲侑食
樂作內官斟酒捧爵至御案前鴻臚寺贊跪文武百官
皆跪教坊司跪奏進酒鴻臚寺官贊俯伏興平身樂止
贊各就坐百官就座簪花訖教坊司跪奏平定天下之
舞舞畢出教坊司跪奏二奏仰天恩之曲樂作內官斟
酒捧爵至御案前教坊司奏進酒進酒畢樂止殿外導

湯樂作至殿內迎湯樂作內官捧湯至御案前教坊司
奏進湯樂作鴻臚寺官贊饌成內官徹湯樂止教坊司
奏黃童白叟鼓腹謳歌承應舞畢奏撫安四夷之舞舞
畢教坊司跪奏三奏感地德之曲樂作進酒如前儀樂
止教坊司跪奏車書會同之舞舞畢教坊司跪奏四奏
民樂生之曲樂作進酒如前儀樂止殿外導湯樂作至
殿內迎湯樂作內官捧湯至御案前教坊司奏進湯樂
作鴻臚寺官贊饌成內官徹湯樂止教坊司跪奏表正

萬拜之舞舞畢教坊司跪奏五奏感皇恩之曲樂作進
酒如前儀樂止殿外導湯膳樂作至殿內迎湯膳樂作
內官捧湯膳至御案前教坊司奏進膳樂作鴻臚寺官
贊饌成內官徹湯膳并御筵樂止教坊司跪奏五奏天
命有德之舞舞畢奏纓鞭德勝蠻夷隊舞承應畢教坊
司更進致語畢鴻臚寺官復贊四拜平身樂止鴻臚寺
官跪奏禮畢

事例

凡大祀天地次日慶成大宴文武百官及四夷使臣土
官人等其位次公侯駙馬伯文職四品以上及學士武
職都指揮使以上陞殿東西侍坐學士坐于文職四品
官之上翰林院左右春坊經筵官六科都給事中尚寶
司卿少卿司丞通政司叅議大理寺寺丞國子監司業
帶俸叅議太常寺寺丞鴻臚寺少卿寺丞順天府治中
欽天監正副太醫院院使院判神樂觀提點道錄司知
觀等官中左門序坐皇親都指揮同知僉事達官都指

揮同知僉事署都指揮僉事皇親正副千戶百戶所鎮
撫兵馬副指揮外國副使海西女直都指揮等官中右
門序坐翰林院修撰等官六科給事中監察御史中書
舍人陪祀郎中員外郎五府經歷都察院經歷都事照
磨檢校司務翰林院帶俸官太常寺典簿博士等官犧
牲所千百戶詹事府主簿通事舍人鴻臚寺署丞主簿
序班欽天監五官等官太醫院御醫達官指揮使同知
僉事正千戶副千戶百戶所鎮撫外國四夷人等丹墀

東序坐指揮使指揮同知陪祀指揮同知僉事外國四夷人等丹墀西序坐其遇朝覲各布政司方面行太僕寺卿運使知府官員陪祀者與宴方面官列于中左門班次卿運使知府列于東丹墀班次衍聖公張真人與宴列于二品文官班次其餘真人領宴及以事故者亦領宴其法王佛子國師禪師僧官刺麻俱於大慈恩寺宴內官一員待宴先期本部行各衙門開預宴官員職名畫位次進呈仍懸長安門示衆宴之日糾儀御史四

人二人立于殿東西二人立于丹墀錦衣衛鴻臚寺禮
科亦各委官糾舉宣德八年命朝鮮黑婁琉球陪臣列
于殿內東西班後侍坐正統三年特命翰林院侍講一
人升殿列學士之下天順三年令張真人不必預宴賜
饌與之四年令女直都督列於殿內西班後侍坐六年
令安南陪臣迤北使臣列於殿內東西班後侍坐成化
四年令脩撰等官給事中御史中書舍人及錦衣衛堂
上官凡近侍風憲者另列于丹陛下之東西稍北其陪

祀官郎中員外郎以下及各衙門官分列於丹陛下之
南

明會典卷七十

欽定四庫全書

明會典卷七十一

禮部三十

大宴儀二

事例

凡正旦冬至萬壽聖節洪武永樂間大宴並如慶成儀
宣德正統後朝官不與宴者給賜節錢鈔錠各處進表
官亦令與宴免宴則通賜節錢

凡立春元宵四月八端午重陽臘八等節永樂間俱於奉天門通賜百官宴用樂其後賜宴日早朝畢光祿寺面奏百官復入班行叩頭禮駕還宮百官出宴於午門外不用樂宴畢復向闕行叩頭禮乃退

凡東宮千秋節永樂間賜五府六部等衙門堂上官左右春坊科道近侍錦衣等衛隨駕帶刀指揮千戶等官及天下進箋官宴於文華殿并文華門東西廊王府進箋官并外國使臣宴於本部宣德以後通宴於午門外

凡皇太后壽旦正統四年賜百官通宴於午門外

大宴樂一

洪武間定

殿內侑食樂

樂器

麾竿一

祝一

敔一

搏拊一

琴四

瑟二

簫四

笙四

笛四

埙二

箎二

排簫二

鍾一

磬一

應鍾一

樂章

一奏炎精開運之曲

諸司職掌原不開此曲今備于此

炎精開運篤生聖皇大明御極遠紹虞唐河清海宴物

阜民康戚加夷獠德被戎羌八珍有薦九鼎馨香鼓鐘
鎖鎖宮徵洋洋怡神養壽理陰順陽保茲遐福地久天
長

二奏皇風之曲

皇風被八表熙熙聲教宣時和景象明紫宸開繡筵龍
袞曜朝日金爐裊祥烟濟濟公與侯被服麗且鮮列座
侍丹宸磬折在周旋羔豚升華俎玉饌充方圓初筵奏
南風繼歌賡載篇瑤觴欣載舉拜俯禮無愆同樂及斯

辰於皇千萬年

奏平定天下之舞

舞士三十二人皆左執干干長三尺五寸上濶一尺下
廣六寸朱質上畫雉羽中畫升龍雲氣右秉戚戚長二
尺五寸朱紅漆柄金裝戚斧分為四行每行八人舞作
發揚蹈厲坐作擊刺之狀皆冠黃金束髮冠紫紛纓青
羅生色畫舞鶴花窄袖衫白生絹襯衫錦領紅羅銷金
大袖窄袍紅羅銷金裙皂生色畫衣沿襪白羅銷金汗

袴藍青羅銷金沿紅絹擁項紅結子紅絹束腰塗金束帶青絲大條錦臂鞬綠雲頭皂靴舞師二人執旌以引之旌長七尺五寸朱紅漆柄金龍吞口懸五采羽九層每層用塗金寶蓋紅絲條穿末垂絲結子皆冠黃金束髮冠紫紛纓青羅大袖衫白絹襯衫錦領塗金束帶綠雲頭皂靴

樂章

青海宇

拔劍起淮土策馬定寰區王氣開天統寶歷應乾符武
畧文謨龍虎風雲創業初將軍星繞弁勇士月彎弧選
騎平南楚結陣下東吳跨蜀長驅萬里山河壯帝居

三奏眷皇明之曲

赫赫上帝眷我皇明大命既集本固支榮厥本伊何育
德春宮厥支伊何藩邦以寧慶延百世澤被羣生及時
為樂天祿是膺千秋萬歲永觀厥成

奏撫安四裔之舞

舞士十六人東方四人椎髻於後繫紅銷金頭繩紅羅
銷金抹額中綴塗金博山兩旁綴塗金環明金耳環青
羅生色畫衣大袖衫紅生色領袖紅羅銷金裙青銷金
裙沿紅生絹襯衫錦領塗金束帶烏皮鞋西方四人間
道錦纏頭明金耳環紅紵絲細褶襖子大紅羅生色雲
肩綠生色沿藍青羅銷金汗袴紅銷金沿繫腰合鉢十
字泥金數珠五色銷金羅香囊紅絹擁項紅結子赤皮靴南
方四人綰朝天髻繫紅羅生色銀錠紅銷金抹額明金

耳環紅織金短襖子綠織金細褶短裙絨綿袴子間道
紵絲手巾泥金頂牌金珠纓絡綴小金鈴錦行纏泥金
獅蠻帶綠銷金擁項紅結子赤皮靴北方四人戴單于
冠貂鼠皮簷雙垂髻紅銷金頭繩紅羅銷金抹額諸色
細褶襖子藍青生色雲肩紅結子紅銷金汗袴繫腰合
鉢皂皮靴四裔各為一行舞作拜跪朝謁喜躍俯伏之
狀舞師二人執幢以引之幢長七尺五寸朱紅漆柄金頭
吞口懸五采羅幢五層每層綴五色銷金吹帶末垂紅

粉結子皆戴白捲簷毡帽塗金帽頂一撒紅纓紫羅帽
襟紅綠金繡襖子白銷金汗袴藍青銷金沿塗金束帶
綠擁頂紅結子赤皮靴

樂章

小將軍

大明君定宇寰聖恩寬掌江山黃支烏弋赤甲朱鳶手
高擎寶貝盃

殿前歡

五雲宮闕連霄漢，金光明照眼。
玉溝金水聲潺潺，頤觀趨蹌看儀鑾。
嚴肅百千般威，人心膽寒。

慶新年

虎豹關文武班，五彩間慶雲。
朝霞燦黃金殿，喜氣增丹墀。
內仰聖顏翠遶紅圍，錦繡班高樓十二欄。
笙簫趣紫檀仙音韻，瑤簫按拜舞齊歌。
謠讚吾皇萬壽安。

過門子

定宇寰定宇寰，掌江山撫百蠻。
謳歌拜舞仰祝讚，萬萬

年帝業安

四奏天道傳之曲

馬負圖兮天道傳龜載書兮人文宣義卦畫兮禹疇叙
皇極建兮合自然綿綿歷數歸明主祥麟在郊威鳳舞
九夷八貢康衢謠聖子神孫繼祖武垂供無為邁前古

奏車書會同之舞

舞士三十二人左執籥籥長一尺五寸朱紅漆篴竹為
之上門三竅右秉翟翟長三尺五寸朱紅漆柄金龍吞

口上綴雉羽五層每層用塗金寶蓋紅絲條穿末用紅絲結子分為四行每行八人舞坐作進退舒徐揖讓升降之狀皆冠黑光描金方山冠青紛纓衣素紅羅大袖衫紅生絹襯衫錦領紅羅擁頂紅結子塗金束帶白絹大口袴白布襪茶褐鞋舞者二人執翽以引之翽長七尺五寸朱紅漆柄金龍吞口懸白鷺羽九層用塗金寶蓋紅絲條穿末垂紅絲結子冠服與舞士同惟大袖衫用青不用紅羅頂紅結子

樂章

泰階平

乾坤清寧治功告成武定禍亂文致太平郊則致其禮
廟則盡其誠卿雲在天甘露零風雨時若百穀登禮樂
雍和政刑肅清儲嗣既立封建乃行讒佞屏四海賢俊
立朝廷玉帛鐘鼓陳兩楹君臣賡歌揚頌聲

五奏振皇綱之曲

周南詠麟趾卷阿歌鳳凰藹藹稱多士為楨振皇綱赫

赫我大明德尊踰漢唐百揆脩庶績公輔理陰陽峨冠
正襟珮都俞在高堂坐令八紘內熙熙民樂康氣和風
雨時田疇見豐穰獻禮過三爵歡娛良未央

奏百戲承應

六奏金陵之曲

鐘山蟠蒼龍石城距金虎千年王氣都于今歸聖主六
代繁華輕幾秋江流東去無時休誰言天塹分南北英
雄豈但嗤曹劉我皇昔住濠梁屋神遊天錫真人服提

兵乘勢渡江來詞臣早獻金陵曲歌金陵進珍饌諧八
音繼三嘆請觀漢祖用兵時為嘗馮異滹沱飯

奏百戲承應

七奏長楊之曲

長楊曳綠黃鳥和鳴齒齒呈鮮紫燕輕盈千花浥露日
麗風清及時為樂芳樽在庭管音嘒嘒絲韻泠泠玉振
金聲各奏尔能皤皤國老載勸載懲明德惟馨垂之聖
經唐風示戒永保嘉名無已太康哲人是聽

奏百戲承應

八奏芳醴之曲

夏王厭芳醴商湯遠色聲聖人示深戒千春垂令名惟
皇登九五玉食保尊榮日昃不遑餐布德延羣生天庖
具豐膳鼎鼐事調烹豈但資肥甘亦足養遐齡達人悟
茲理恒令五氣平隨時知有節昭哉天道行

奏隊舞承應

九奏駕六龍之曲

日麗中天漏下遲公卿侍宴多令儀蕭韶九奏觴九獻
爐烟細逐祥風吹羣臣舞蹈天顏喜歲熟民康長若此
六龍廻駕鳳樓深寶扇齊開扶玉几景星呈瑞慶雲多
兩曜增暉四序和聖人道大如天地歲歲年年奈樂何
奏隊舞承應

進膳樂

樂器

笙二

笛二

鼓一

板一

杖鼓八

樂章

水龍吟

寶殿祥雲紫氣濛
龍德宮聖明君
氤氲霧靄檜栢間青
松龍樓鳳閣雕梁畫棟
此是蓬萊洞

太平清樂

樂器

笙四

笛四

頭管二

簫四

杖鼓八

小鼓一

板一

方響一

樂章

太清歌

萬國來朝進貢仰賀明聖主一統華夷普天下八方四海南北東西託聖德堯王保護國家太平天下都歸一

將兵器銷為農器旌旗不動酒旗招仰荷天地

上清歌

一願四時風調雨順民心喜攝外國將寶貝攝外國將
寶貝見君王來朝寶殿裏珊瑚瑪瑙玻璃進在丹墀

開天門

託長生日月光天德萬萬歲永固皇基公卿文武來朝
會開玳宴捧金杯

設立大樂

樂器

戲竹二

簫四

笙四

笛二

頭管二

琵琶二

纂二

二十絃二

方響二

鼓一

板一

杖鼓八

陞座還宮

樂章

萬歲樂

雨順風調昇平世萬萬年山河社稷八方四面狼烟息
慶龍虎風雲會

百官行禮

樂章

朝天子

聖德聖威洪福齊天地玉階前文武兩班齊擺列在丹

墀內舞蹈揚塵山呼萬歲統山河壯帝畿禮儀讚喜慶
龍虎風雲會

迎膳樂

樂器

戲竹二

笙一

笛四

頭管二

簫二

鼓一

板一

杖鼓十

樂章

水龍吟

同前

大祀慶成大宴萬國來朝隊舞纓鞭德勝隊舞萬壽聖
節大宴九夷進寶隊舞壽星隊舞冬至大宴讚聖喜隊
舞百花聖朝隊舞正旦大宴百戲蓮花盆隊舞勝鼓保
蓮隊舞

明會典卷七十一